

apicem versus modice angustatis, disco apicem versus parum declivi, callis obsolete, margine apicali recto. Scutellum basi detectum. Hemelytra completa, membrana bi-areolata. Xyphus prosterni convexus, breviter triangularis. Mesosternum breve. Femora omnia punctis majoribus nigris signata, postica incrassata. Tibiae nigro-spinulosae et nigro-punctatae. Tarsi postici articulo ultimo secundo paullulum brevior. Segmentum maris genitale subtus muticum, terebra feminae medium ventris attingens.

1. *Campylomma nigronasuta* REUT.

Diagnosis: Pallide stramineo-flava, nitida, supra sat longe subtilius flavo-pubescentis, pilis autem praesertim in hemelytris pro certo lumine fuscis; antennis immaculatis; capite, margine postico excepto, pronoto, scutello, mesosterno et segmento ultimo genitali coloris in aurantiacum vergentis; clypeo fere ad basin usque nigerrimo; femoribus parce nigro-punctatis. Long. $2\frac{2}{3}$ mm.

Hab. in Turkestan!, D. FEDTSCHENKO.

Descr.: Corpus pallide stramineo-flavum, nitidum, supra sat longe, subtilius flavo-pubescentis, pilis pro certo lumine autem praesertim in hemelytris fuscis. Caput dilute fere aurantiaco-flavum, margine postico autem albido, vertice oculo circiter $\frac{2}{3}$ latiore (♀). Oculi nigro-fusci. Rostrum coxas posticas attingens, pallide flavum, apice piceo. Antennae totae pallido-flavae, tantum articulo primo intus atomo fusco notato. Pronotum colore nonnihil in aurantiacum vergens. Scutellum dilute flavum, basi sub-aurantiacum. Hemelytra dilute flavescens, corio plaga dilutissime ferruginea, cuneo summo margine externo apiceque ferrugineis; membrana sub-hyalina, iridescente, venis albidis. Mesosternum sub-aurantiacum. Pedes albido-flavi, femoribus anterioribus tantum punctis duobus magnis, altero marginis superioris prope apicem posito, altero marginis inferioris longius ab apice remoto, atomisque paucis (4—5) marginis inferioris; femoribus posticis punctis tribus magnis nigris, uno in margine superiore prope apicem posito, setifero, duobusque marginis inferioris, quarum altero fere in triente apicali, altero in medio posito, disco adhuc atomis nonnullis nigris adpersis; tibiis nigro-spinulosis, spinulis tantum in triente basali tibiis e punctis nigris parvulis nascentibus; tarsis articulo ultimo summo apice unguiculisque testaceis.

2. *Campylomma Verbasci* H. SCH.

Tab. III, fig. 6.

Diagnosis: Subtus fusca vel piceo-nigra, supra virescenti-grisea vel sordide grisescenti-albida, nitida, pilis longioribus flavescens pro certo lumine fuscis aliisque brevibus flavis pubescens; capite testaceo, clypeo dimidio apicali nigro-fusco; antennis articulo primo annulo ante apicem basique articuli secundi nigris; corio plaga discoidali saepe obsoleta cuneoque macula media fuscis; femoribus posticis punctis pluribus nigris. Long. $2\frac{2}{3}$ mm.